



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

19. 5. 2025. – 23. 5. 2025.

ODJELJENJE ZA BANKARSTVO, SLUŽBA FRONT OFFICE



Sarajevo, 26. 5. 2025. godine

SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA **19. 5. 2025. – 23. 5. 2025.**


Tabela 1: Prikaz kretanja prinosa na državne obveznice

Prinosi	Eurozona			SAD			Velika Britanija			Japan		
	16.5.25	-	23.5.25	16.5.25	-	23.5.25	16.5.25	-	23.5.25	16.5.25	-	23.5.25
2 godine	1,86	-	1,76	↘	4,00	-	3,99	↘	4,01	-	3,98	↘
5 godina	2,16	-	2,10	↘	4,09	-	4,08	↘	4,15	-	4,13	↘
10 godina	2,59	-	2,57	↘	4,48	-	4,51	↗	4,65	-	4,68	↗

Tabela 2: Prikaz kretanja prinosa na njemačke Bubillove

Dospijeće	Prinosi			
	16.5.25	-	23.5.25	
3 mjeseca	1,748	-	1,886	↗
6 mjeseci	1,875	-	1,806	↘
1 godina	1,833	-	1,756	↘

Grafikon 1: Prikaz krivulja prinosa državnih obveznica



Grafikon prikazuje krive prinosa Njemačke (zelena), SAD (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 23. 5. 2025. godine (pune linije) i 16. 5. 2025. godine (isprekidane linije). Na donjem dijelu grafikona je prikazana razlika između vrijednosti odgovarajućih prinosa na navedene datume.

EUROZONA

U odnosu na prethodnu sedmicu prinosi obveznica eurozone su smanjeni između 2 i 10 baznih poena. Prema objavljenim novim projekcijama Evropske komisije očekuje se da će se sljedeće godine stopa inflacije u eurozoni smanjiti ispod ciljanih 2% zbog posljedica američke trgovinske politike, te da će ista biti smanjena na 1,7%. Očekuje se i da će se stopa ekonomskog rasta eurozone u sljedećoj godini ubrzati na 1,4% sa ovogodišnjih 0,9%, te da će tržište ostati snažno, uprkos neizvjesnosti koja opterećuje domaću potražnju, kao i da će ukupni odnos javnog duga i BDP-a eurozone u sljedećoj godini porasti na 91% sa 89%, koliko je iznosio u 2024. godini. Član UV ECB Muller je izjavio da ECB može razmotriti, ali da mora biti oprezna po pitanju budućih smanjenja kamatnih stopa jer ne postoji očigledna potreba da se aktivno podrži ekonomski rast. Smatra da su kamatne stope već sada dovoljno niske i da nije očigledno da trebaju biti značajno smanjene.

Prema objavljenom zapisniku sa aprilske sjednice UV ECB, neki zvaničnici su smatrali da je smanjenje kamatnih stopa na toj sjednici predstavljalo ubrzano smanjenje za koje se ranije očekivalo da će se desiti u junu. Sada se očekuje da će ECB ponovo smanjiti kamatne stope u junu usljed američkih tarifa koje negativno utiču na ekonomski rast i jačanje eura, što bi moglo dovesti do bržeg pada inflacije na 2% u poređenju s ranijim očekivanjima. Član IV ECB Schnabel je istakla napredak ka cilju smanjenja inflacije na 2%, ali je upozorila na izazove izazvane globalnim trgovinskim tenzijama, navodeći da bi tarife mogle kratkoročno smanjiti inflaciju, ali i povećati je u srednjem roku, naglasivši potrebu za stabilnom monetarnom politikom. Član UV ECB Knot je izjavio da je još jedno smanjenje

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

kamatnih stopa moguće sljedećeg mjeseca, ali je i on ukazao na važnost razumijevanja uticaja trgovinskih politika na relaciji SAD - EU prije razmatranja smanjenja kamatnih stopa, fokusirajući se na srednjoročne do dugoročne inflatorne trendove. Slično, Escriva je upozorio na to da bi američke tarife i nepredvidive trgovinske politike mogle predstavljati rizike po globalnu finansijsku stabilnost i ekonomski rast, potencijalno smanjujući povjerenje investitora. Upozorio je i na značajan indirektan uticaj na ekonomiju Španije jer bi izvozne tarife mogle biti povećane na 18% sa 12%, dodatno pojačavajući ekonomske rizike. Član UV ECB Centeno je sugerisao da se kamatne stope smanje ispod „neutralnog nivoa“ od 1,5%-2,0% kako bi se spriječilo da se inflacija smanji ispod ciljanih 2%, a usljed slabijeg ekonomskog rasta.

Panel ekonomskih eksperata kancelara Njemačke Merza očekuje da će ekonomija Njemačke u ovoj godini stagnirati (ranije očekivan rast od 0,4%), iako je oporavak na vidiku zahvaljujući vladinim planovima potrošnje. Očekuje se da će ekonomija biti pogođena padom industrije i američkim tarifama, dok bi najavljeni fiskalni plan u vrijednosti 500 milijardi EUR mogao ubrzati ekonomski rast na 1,0% u 2026. godini.

Tabela 3: Kretanje ekonomskih indikatora za eurozonu

Red. br.	Ekonomski indikatori	Očekivanje	Stvarno	Prethodni
			stanje	period
1.	Stopa inflacije – EZ F APR	2,2%	2,2%	2,2%
2.	Temeljna stopa inflacije – EZ F APR	2,7%	2,7%	2,4%
3.	PMI kompozitni indeks – EZ P MAJ	50,6	49,5	50,4
4.	BDP – Njemačka (Q/Q) F I kvartal	0,2%	0,4%	-0,2%
5.	Trgovinski bilans – Španija (u milijardama EUR) MAR	-	-5,48	-3,43
6.	Bilans tekućeg računa – EZ (u milijardama EUR) MAR	-	50,9	40,6
7.	Bilans tekućeg računa – Italija (u milijardama EUR) MAR	-	1,64	1,61
8.	Indeks povjerenja potrošača – EZ P MAJ	-16,0	-15,2	-16,6
9.	Ifo indeks očekivanog povj. investitora – Njemačka MAJ	88,0	88,9	87,4
10.	Maloprodaja – Francuska (G/G) APR	-	0,4%	-0,8%
11.	Proizvođačke cijene – Njemačka (G/G) APR	-0,6%	-0,9%	-0,2%
12.	Proizvođačke cijene – Irska (G/G) APR	-	-3,6%	-1,9%
13.	Proizvođačke cijene – Portugal (G/G) APR	-	-2,7%	-1,3%
14.	Stopa nezaposlenosti – Finska APR	-	10,0%	10,1%

SAD

Prinosi američkih državnih obveznica su se tokom protekle sedmice kretali u uskom rasponu. Početak sedmice je bio obilježen vijestima o smanjenju kreditnog rejtinga SAD od strane Moody's agencije. Moody's je također smanjio rejting za depozite kod nekih od najvećih banaka na Wall Streetu, uključujući BofA, JPMorgan i Wells Fargo. Moody'sovo smanjenje rejtinga, nakon sličnih poteza S&P (2011.) i Fitcha (2023.), naglašava zabrinutost zbog rastućih deficita i smanjenja poreza. U fokusu tržišnih učesnika protekle sedmice je bio zakon o porezima i potrošnji, koji je Predstavnički dom SAD-a usvojio, te je isti dalje prosljeđen Senatu. Nacrt zakona uključuje smanjenje poreza, povećanu potrošnju na vojsku i osiguranje granica, pooštavanje prava na socijalnu pomoć i popuštanje propisa o vatrenom oružju, dodajući 3,8 biliona dolara javnom dugu od 36,2 biliona dolara u narednoj deceniji.

U kontekstu komentara zvaničnika FED-a, član FOMC-a Waller je signalizirao potencijalna smanjenja referentne kamatne stope u drugoj polovini ove godine, ako se tarife Trumpove administracije smanje na 10% do jula, te je upozorio na rastuće deficite i troškove zaduživanja u skladu s planovima republikanskog budžeta. Waller je umanjio dugoročne rizike inflacije zbog carina, istovremeno naglašavajući neizvjesnost trgovinske politike i zabrinutost oko potražnje za američkim vrijednosnim papirima. Predsjednik FED-a iz New Yorka Williams je sugerisao da kreatori monetarne politike možda neće biti spremni da smanje kamatne stope prije septembra zbog „mutnih“ ekonomskih izgleda. Bostic iz Atlante predviđa jedno smanjenje referentne kamatne stope ove godine, navodeći zabrinutost zbog inflacije i potencijalni ekonomski uticaj Moody'sa na smanjenje američkog državnog duga. Predsjednica FED-a iz Dallasa Logan je izjavila da bi FED trebao razmotriti jačanje mehanizama pomoću kojih sprečava nagle skokove kamatnih stopa na tržištu novca u vrijeme tržišnog stresa. Odvojeno, direktor JPMorgan Chase & Co. Dimon je

izjavio da se ne može isključiti mogućnost da će ekonomija SAD bilježiti stagflaciju, jer se zemlja suočava s ogromnim rizicima od geopolitičkih problema, deficita i pritisa na cijene.


Vijest koja je obilježila globalna finansijska tržišta na kraju sedmice je uvođenje tarifa EU od strane SAD-a. Predsjednik Trump je najavio uvođenje carina od 50% na robu iz EU počevši od 1. juna i poreza od 25% na Apple ako se iPhone ne bude proizvodio u SAD. Kasnije tokom vikenda, predsjednik Trump je izjavio da je produžio rok za carine od 50% za EU do 9. jula nakon telefonskog razgovora sa Ursulom von der Leyen.

Prema rezultatima istraživanja Bloomberg-a za maj, ekonomski analitičari prognoziraju da će ekonomija SAD-a u tekućoj godini zabilježiti ekspanziju po stopi od 1,3%, dok se za 2026. i 2027. godinu prognoziraju stope od 1,5% i 1,9%, respektivno. Prognozirana stopa inflacije za tekuću godinu je blago smanjena na 3,0% (prethodno prognozirano 3,2%), dok je za narednu godinu ostala nepromijenjena na nivou od 2,8%. Većina anketiranih ekonomista očekuje da će FED na junskoj sjedinici zadržati referentnu kamatnu stopu na trenutnom nivou, dok vjerovatnoća recesije u narednih 12 mjeseci iznosi 40%.

Tabela 4: Kretanje ekonomskih indikatora za SAD

Red. br.	Ekonomski indikator	Očekivanje	Stvarno stanje	Prethodni period
1.	Vodeći indeks APR	-1,0%	-1,0%	-0,8%
2.	PMI indeks uslužnog sektora P MAJ	51,0	52,3	50,8
3.	PMI indeks prerađivačkog sektora P MAJ	49,9	52,3	50,2
3.	Broj zahtjeva za hipotekarne kredite 16. maj	-	-5,1%	1,1%
4.	Inicijalni zahtjevi nezaposlenih za pomoć 17. maj	230.000	227.000	229.000
5.	Kontinuirani zahtjevi nezaposlenih za pomoć 10. maj	1.882.000	1.903.000	1.867.000
6.	Broj građevinskih dozvola (M/M) F APR	-	-4,0%	1,9%

Grafikon 2: Kretanje kursa EURUSD tokom protekle sedmice



USD je deprecirao u odnosu na EUR, te je kurs EURUSD zabilježio rast s nivoa od 1,1163 na nivo od 1,1362.

VELIKA BRITANIJA

Velika Britanija i EU su postigle „post-Brexit” sporazum, za koji se očekuje da će povećati ekonomsku aktivnost u Velikoj Britaniji za 9 milijardi GBP. Ključni elementi sporazuma uključuju mogućnost pristupa Velike Britanije fondu EU za odbranu u vrijednosti od 150 milijardi EUR, ublažavanje graničnih provjera britanskog izvoza hrane u zamjenu za prilagođavanje Velike Britanije standardima EU za hranu, te produženje pristupa EU britanskim ribarskim vodama do 2038. godine. Sporazum također ima za cilj olakšavanje mobilnosti mladih i jačanje međusobnih veza Velike Britanije i EU u uslovima globalnih izazova kao što su rat između Rusije i Ukrajine i uvođenje tarifa SAD. Međutim, trgovinske barijere nastale nakon Brexita su i dalje prisutne, kao i politički rizici za premijera Velike Britanije Starmera, a kritičari ocjenjuju postignuti sporazum kao prilagođavanje Velike Britanije zahtjevima EU.

U aprilu je inflacija u Velikoj Britaniji posmatrano na godišnjem nivou povećana na 3,5%, više od očekivanih 3,3%. Istovremeno je temeljna stopa inflacije povećana na 3,8% sa 3,4% (očekivano 3,6%). Glavni uzroci su rast inflacije u aprilu u uslužnom sektoru i rast cijena aviokarata, te rast cijena plina, struje, vode i veći porezi poslodavcima.

Prema istraživanju Bloomberg-a, ekonomija Velike Britanije će u 2025. godini zabilježiti rast od 1,0%, dok se u 2026. godini očekuje rast od 1,1% i u 2027. godini rast od 1,5%. U 2025. godini se očekuje stopa inflacije od 3% na godišnjem nivou (ranije očekivano 3,1%), dok su prognoze za 2026. nepromijenjene, na nivou 2,3%. Učesnici ankete smatraju da BoE do kraja drugog kvartala neće smanjivati referentnu kamatnu stopu s trenutnog nivoa od 4,25%, te ocjenjuju da vjerovatnoća nastanka recesije u narednih 12 mjeseci iznosi 40%.

Glavni ekonomista BoE Pill je objasnio da njegov glas za zadržavanje kamatnih stopa na nivou 4,25% znači da je smatrao da treba preskočiti smanjivanje na tom sastanku, a ne da glasa za zaustavljanje ublažavanja monetarne politike. S druge strane, Dhingra iz MPC BoE je na sastanku glasala za smanjenje kamatne stope za 50 baznih poena. Ona je poznata po zalaganju za blažu monetarnu politiku i smatra da su veći potezi efikasniji kada se koriste umjereno. Tržišni učesnici sada očekuju da će referentna kamatna stopa biti na nivou od 4%, što podrazumijeva još samo jedno smanjenje ove godine umjesto prethodno očekivana dva smanjenja, dok se vjerovatnoća smanjenja stope u augustu smanjila na 50% s prethodnih 60%. Povjerenje potrošača je u maju poboljšano, ali BRC (British Retail Consortium) upozorava na izazove koji nastaju zbog rasta troškova za poslodavce. BoE će možda odložiti smanjenja kamatnih stopa zbog inflacije i sporog rasta.

Kancelarija za nacionalnu statistiku (ONS) je u petak privremeno uklonila oznaku zvaničnih podataka sa podataka o proizvođačkim cijenama od novembra 2020. godine pa nadalje, zbog pronalaska grešaka u računanju ovih podataka. Predsjednik SAD-a Trump je kritikovao poreze Velike Britanije na naftu i plin kojima se trguje na Sjevernom moru, tvrdeći da one obeshrabruju bušenje nafte i povećavaju troškove energije. On je, usljed rekordno niskih nivoa outputa i protivljenja industrijskog sektora visokim porezima, ponovio svoje protivljenje jednokratnim porezima Velike Britanije na neočekivane velike dobitke kompanija, te podržao „otvaranje” trgovine na Sjevernom moru.

Tabela 5: Kretanje ekonomskih indikatora za UK

Red. br.	Ekonomski indikatori	Očekivanje	Stvarno stanje	Prethodni period
1.	Rightmove indeks cijena kuća (G/G) MAJ	-	1,2%	1,3%
2.	Stopa inflacije (G/G) APR	3,3%	3,5%	2,6%
3.	Stopa temeljne inflacije (G/G) APR	3,6%	3,8%	3,4%
4.	Stopa inflacije u uslužnom sektoru (G/G) APR	4,8%	5,4%	4,7%
5.	Indeks maloprodajnih cijena (G/G) APR	4,2%	4,5%	3,2%
6.	Neto pozajmljivanje javnog sektora (u mlrd GBP) APR	17,9	20,2	14,1
7.	PMI kompozitni P MAJ	49,3	49,4	48,5
8.	PMI prerađivačkog sektora P MAJ	46,1	45,1	45,4
9.	PMI uslužnog sektora P MAJ	50,0	50,2	49,0
10.	GfK indeks povjerenja potrošača MAJ	-22	-20	-23
11.	Maloprodaja (G/G) APR	4,5%	5,0%	1,9%

Tokom protekle sedmice GBP je aprecirala u odnosu na EUR, pa je kurs EURGBP zabilježio pad s nivoa od 0,84045 na nivo od 0,83957. GBP je aprecirala i u odnosu na USD, pa je kurs GBPUSD povećan s nivoa od 1,3283 na nivo od 1,3537.

JAPAN

Premijer Ishiba je upozorio na to da su finansijski uslovi u Japanu lošiji nego u Grčkoj i da nije poželjno daljnje povećavanje javnih troškova zbog rasta troškova pozajmljivanja. Ministar finansija Kato je istakao da je važno izbjegavanje pretjerane volatilnosti vrijednosti valute i održavanje tržišno određenih deviznih kurseva u predstojećim pregovorima sa ministrom finansija SAD-a Bessentom na sastanku G7. Iako tarife dominiraju u diskusijama SAD-a i Japana, bit će nastavljena rasprava o valutnoj politici i to bez posebnih ciljanih vrijednosti, bez obzira na ranije kritike SAD-a u vezi sa slabljenjem JPY. Japan sada razmatra prihvatanje smanjenih tarifa SAD-a umjesto traženja potpunog izuzeća, što signalizira potencijalno postizanje kompromisa u pregovorima. Japan ponovo razmatra izuzimanje manjih pošiljki od poreza, uključujući dostave iz Kine, kako bi se riješio problem zabrinutosti za fer konkurenciju i nelegalnu robu.

Zamjenik guvernera BoJ Uchida je signalizirao mogućnost daljnjih povećanja kamatnih stopa ukoliko se ekonomija Japana oporavi, bez obzira na uticaj tarifa SAD-a. Postizanje stope inflacije blizu ciljanih 2% zavisi od oporavka ekonomije, iako daljnji rast cijena proizlazi iz uvoza i troškova za hranu. Kontrakcija ekonomije Japana i zabrinutost zbog trgovinske politike SAD-a uzrokovali su smanjenje prognoza BoJ za ekonomski rast nakon povećavanja kamatne stope na 0,5% u januaru.

Nikkei je objavio da Japan razmatra odlaganje uravnoteženog budžeta za fiskalnu 2025. godinu do „oko 2025. do 2026. godine“, zbog ekonomske neizvjesnosti usljed tarifa SAD-a. Odluka se očekuje u junu, a dolazi usred rasta

pritiska za povećanje javne potrošnje ili smanjenje poreza kako bi se ublažili rastući troškovi života pred izbore za Gornji dom Parlamenta, koji će se održati u julu. Zabrinutost zbog rastućeg javnog duga Japana povećala je prinose na obveznice s dugim rokom dospijeća na rekordne nivoe.

Prema anketi Bloomberg, ekonomija Japana će rasti po stopi od 0,8% u 2025. godini, te u 2026. i 2027. godini 0,7%, odnosno za 0,8%, respektivno. Mogućnost da će doći do recesije u narednih godinu dana iznosi 40%. Prognoza rasta BDP u II kvartalu iznosi 0,2% što je manje u odnosu na prethodne prognoze (0,5%). Očekuje se da će se inflacija u 2025. godini povećati na 2,8%, što je više od prethodnih očekivanja (2,7%), dok se za 2026. godinu očekuje povećanje na 1,8%, što je manje od prethodnog očekivanja (1,9%). Očekuje se da BoJ neće mijenjati referentnu kamatnu stopu, te da će na kraju godine ona iznositi 0,5%, isto koliko i trenutno iznosi.

Tabela 6: Kretanje ekonomskih indikatora za Japan

Red. br.	Ekonomski indikatori		Očekivanje	Stvarno stanje	Prethodni period
1.	Indeks uslužnog sektora (M/M)	MAR	-0,2%	-0,3%	0,5%
2.	Trgovinski bilans (u mlrd JPY)	APR	215,3	-115,8	559,4
3.	Izvoz (G/G)	APR	2,5%	2,0%	4,0%
4.	Uvoz (G/G)	APR	-4,2%	-2,2%	1,8%
5.	Porudžbine osnovnih mašina (G/G)	MAR	-1,8%	8,4%	1,5%
6.	PMI kompozitni indeks P	MAJ	-	49,8	51,2
7.	PMI indeks prerađivačkog sektora P	MAJ	-	49,0	48,7
8.	PMI indeks uslužnog sektora P	MAJ	-	50,8	52,4
9.	Porudžbine mašinskih alata (G/G)	APR	-	7,7%	11,4%
10.	Inflacija (G/G)	APR	3,5%	3,6%	3,6%
11.	Prodaje širom zemlje (G/G)	APR	-	-4,5%	-2,8%

JPY je tokom protekle sedmice aprecio u odnosu na EUR, te je kurs EURJPY zabilježio smanjenje s nivoa od 162,64 na nivo od 161,91. JPY je blago aprecio i u odnosu na USD, te je kurs USDJPY zabilježio smanjenje s nivoa 145,70 na nivo od 142,56.


NAFTA I ZLATO

Cijena jednog barela sirove nafte na otvaranju tržišta u ponedjeljak je iznosila 62,49 USD (55,98 EUR).

Inicijalno nakon otvaranja tržišta cijena nafte je zabilježila smanjenje jer su se tržišta fokusirala na pregovore o ratu u Ukrajini i Moody'sovo snižavanje kreditnog rejtinga SAD. Smanjenje rejtinga je pojačalo zabrinutost zbog tržišta obveznica u SAD-u i usporavanja ekonomije, što je zamagljilo izgleda za potražnju za naftom. Ipak, do kraja trgovanja cijena ovog energenta je korigovana naviše. Analitičari ističu da bi niže cijene nafte i slabiji dolar mogli podržati globalnu potražnju za ovim energentom. U utorak se cijena nafte kretala u uskom rasponu, dok je iranski vrhovni vođa izrazio skepticizam u vezi s nuklearnim pregovorima sa SAD-om, umanjujući nade u sporazum. Dogovor bi potencijalno mogao dodati još barela tržištu za koje se očekuje da će se kasnije ove godine suočiti s prekomjernim snabdijevanjem. U srijedu je cijena nafte zabilježila smanjenje zbog globalnog rizika i povećanja zaliha sirove nafte u SAD-u više od očekivanog. Prema podacima EIA, zalihe sirove nafte u SAD-u, u sedmici zaključno sa 16. majem, porasle su za 1,33 miliona barela, dok su zalihe benzina povećane za 816.000 barela. Izvještaj CNN-a je sugerisao da bi Izrael mogao napasti iranska nuklearna postrojenja. Napad na Iran mogao bi poremetiti nuklearne pregovore, pojačati nemire na Bliskom istoku i potencijalno ukloniti milion barela dnevno iz iranskih zaliha. Smanjenje cijene nafte je nastavljeno i u četvrtak pod uticajem vijesti da OPEC+ razmatra još jedno značajno povećanje proizvodnje u julu, potencijalno trećem uzastopnom mjesecu povećanja proizvodnje. Predloženo povećanje od 411.000 barela dnevno, trostruko veće u odnosu na početni plan, u razmatranju je ali nije finalizirano. Saudijska Arabija je upozorila članice koje pretjerano proizvode na daljnje promjene politike, ukoliko se usklađenost ne bude ispoštovala. Tokom trgovanja u petak cijena nafte je bilježila izražene fluktuacije nakon najave predsjednika Trumpa o uvođenju tarifa EU.

Na zatvaranju tržišta u petak cijena jednog barela sirove nafte je iznosila 61,53 USD (54,15 EUR), što predstavlja pad od 1,54% na sedmičnom nivou.

Grafikon 3: Kretanje cijene nafte tokom protekle sedmice



Na otvaranju londonske berze metala u ponedjeljak cijena jedne fine unce zlata je iznosila 3.203,65 USD (2.869,88 EUR).

Tokom protekle sedmice cijena zlata je imala uzlazni trend. Na početku sedmice cijena ovog plemenitog metala je zabilježila rast, koji je bio podržan vijestima o fiskalnim problemima SAD-a i naslovima o tarifama u kojima je Ministarstvo trgovine Kine pozvalo SAD da „isprave svoje greške“ nakon američkog upozorenja o korištenju Huawei AI čipa. Cijena zlata je nastavila bilježiti rast i u utorak i srijedu podstaknuta slabijim dolarom, fiskalnim problemima SAD-a i tenzijama na Bliskom istoku. Obnovljena zabrinutost zbog budžetskog deficita SAD-a, nakon smanjenja kreditnog rejtinga Moody'sa i izvještaja CNN-a o potencijalnom izraelskom napadu na iranska nuklearna postrojenja, povećala je potražnju investitora za aktivama sigurnog utočišta. U četvrtak je uslijedila blaga korekcija cijene zlata naniže, pod uticajem aprecijacije USD. Na kraju sedmice je zabilježen priličan rast cijene ovog plemenitog metala, nakon što je predsjednik Trump zaprijetio carinama za EU i Apple. Tarifne prijetnje su podstakle potražnju za aktivama sigurnog utočišta, a cijena zlata je od početka godine povećana za 25%. Rastuća fiskalna zabrinutost SAD-a i trgovinske tenzije i dalje podstiču privlačnost zlata.

Uprkos rekordnim cijenama, uvoz zlata u Kinu je dostigao jedanaestomjesečni maksimum od 127,5 metričkih tona u aprilu, što je za 73% više u odnosu na prethodni mjesec. Narodna banka Kine je ublažila ograničenja uvoza ovog plemenitog metala, izdajući nove kvote kako bi se zadovoljila rastuća potražnja investitora koji traže zaštitu usred geopolitičke neizvjesnosti.

Na zatvaranju tržišta u petak cijena jedne fine unce zlata je iznosila 3.357,51 USD (2.955,03 EUR), što predstavlja rast od 4,80% na sedmičnom nivou.

Grafikon 4: Kretanje cijene zlata tokom protekle sedmice

